

Untuk Siaran Segera

SIARAN AKHBAR

Persefahaman Suruhanjaya Tenaga Dengan Bahagian Bekalan Elektrik, Kementerian Kemudahan Awam Sarawak Mengenai Label Keselamatan Kelengkapan Elektrik

KOTA KINABALU, SABAH, 28 Oktober 2015 --- Suruhanjaya Tenaga (ST) hari ini telah menandatangani satu memorandum persefahaman dengan Bahagian Bekalan Elektrik (BBE), Kementerian Kemudahan Awam Sarawak untuk mengiktiraf penggunaan satu label keselamatan bagi kelengkapan elektrik yang dikawal oleh kedua-dua badan kawal selia elektrik tersebut agar ianya diterima dan boleh diguna pakai di Semenanjung Malaysia, Sabah dan Sarawak.

Dalam mengawal selia kelengkapan elektrik di Semenanjung Malaysia dan Sabah, ST hanya mengiktiraf kelengkapan elektrik yang mempunyai label SIRIM-ST, seperti ketetapan di bawah peraturan 98, Peraturan-Peraturan Elektrik 1998.

Oleh kerana kemasukan kelengkapan elektrik dari Sarawak ke Sabah dianggap sebagai satu pergerakan dalaman negara dan bukan satu pengimportan dari luar negara oleh pihak Kastam, terdapat banyak kelengkapan elektrik yang dibawa masuk dari Sarawak ke Sabah mengguna pakai label SIRIM-EIU Sarawak yang berbeza bentuknya daripada label SIRIM-ST. Keadaan ini menyukarkan aktiviti penguatkuasaan yang dijalankan ST bagi mengawal selia pengimportan dan penggunaan kelengkapan elektrik yang tidak diluluskan

“Untuk mengelakkan dari berlaku kekeliruan atas kelengkapan elektrik yang dibawa masuk ke Sabah yang hanya mempunyai label EIU Sarawak dan SIRIM Sarawak, maka ST dan Kementerian Kemudahan Awam Sarawak merasakan agar penggunaan satu label keselamatan bagi kelengkapan elektrik perlu diwujudkan agar ianya diterima dan boleh diguna pakai di Semenanjung Malaysia, Sabah dan Sarawak”, menurut Dato’ Abdul Razak bin Abdul Majid, Pengurus ST.

Berkuatkuasa untuk 5 tahun, memorandum persefahaman ini menyenaraikan sebanyak 34 kategori kelengkapan elektrik berserta dengan standard-standard yang perlu dipatuhi, untuk dikawal selia oleh ST dan BBE, Sarawak. Di antara kelengkapan elektrik yang dikawal tersebut adalah seperti *plug top, air-conditioner, vacuum cleaner, socket outlet, fan, washing machine, water heater* dan lain-lain.

“Dengan adanya satu label, kita berharap agar penyelarasannya terutamanya berkaitan penguatkuasaan terhadap tahap keselamatan kelengkapan elektrik yang dikawal, yang dibawa masuk ke pintu-pintu masuk utama ke negeri Sabah dapat diatasi, di samping dapat mempertingkatkan kerjasama di antara kedua-dua badan kawal selia ini”, menurut Abdul Razak lagi.

Majlis dihadiri oleh Datuk Seri Panglima Dr. Maximus Johnity Ongkili, Menteri Tenaga, Teknologi Hijau dan Air yang juga menjadi saksi acara menandatangani memorandum persefahaman tersebut oleh Datuk Ir. Fauzi bin Hasan, Ketua Pegawai Eksekutif ST dan Tn Syed Mohamad Fauzi bin Sahab, Pengarah, Bahagian Bekalan Elektrik, Kementerian Kemudahan Awam, Sarawak.

Turut hadir adalah wakil-wakil dari Kementerian Kemudahan Awam Sarawak, Kementerian Tenaga, Teknologi Hijau dan Air (KeTTHA), Jabatan Kastam Diraja Malaysia dan SIRIM QAS International.

-Tamat-